

Na osnovu odredbi člana 9. Statuta Fondacije za stipendiranje učenika i studenata „Idriz Jakupović“ (u daljem tekstu: Fondacija), na osnovu ukazane potrebe za unapređenje vlastitih ciljeva i promoviranja najviših civilizacijskih vrijednosti i postignuća u društvu, Upravni odbor Fondacije na svojoj 10. sjednici koja je održana dana 06.02.2018. godine u Sanskom Mostu, usvojio je slijedeći

PRAVILNIK **o uvođenju, kategoriziranju i dodjeljivanju nagrada** **Fondacije „Idriz Jakupović“**

Član 1.

Ovim Pravilnikom se uređuju pravila o uvođenju, kategoriziranju i dodjeljivanju nagrada Fondacije.

Član 2.

Nagrade Fondacije se uvode radi unapređenja ciljeva Fondacije, kao i promoviranja najviših civilizacijskih vrijednosti i postignuća u društvu.

Član 3.

Nagrade se kategoriziraju u sljedećim kategorijama: humani rad, naučni rad, obrazovni rad, književni rad, studentsko zalaganje, učeničko zalaganje, postignuće u kulturi i umjetnosti, dječija humana priča, izuzetno postignuće u sportu, izgradnja mira i međuetnički dijalog, izgradnja socijalne pravde i društvene uključenosti.

Upravni odbor Fondacije, u skladu sa ukazanom potrebom, može da uvede i dodatne kategorije nagrada koje nisu obuhvaćene u prethodnom stavu, ili da ukine pojedine kategorije iz prethodnog stava.

Član 4.

U skladu sa kategorijama navedenim u članu 3. ovog Pravilnika, nagrade imaju nazive na bosanskom/srpskom/hrvatskom jeziku, sa dodatkom naziva na latinskom jeziku.

Prema ukazanoj potrebi, nagrada se može ispisati i na stranom jeziku.

Latinski naziv je citiran kao dodatna odrednica koja simbolizira smisao i značaj predmetne nagrade. Nazivi nagrada su slijedeći:

- Nagrada za životno postignuće iz humanog rada „*Humanum fundatio*“
- Nagrada za životno postignuće iz naučnog rada „*Scientia fundatio*“
- Nagrada za životno postignuće iz obrazovnog rada „*Educationem fundatio*“
- Nagrada za doprinos iz književnog rada „*Literarum fundatio*“
- Nagrada za studentsko zalaganje „*Studiosum fundatio*“
- Nagrada za učeničko zalaganje „*Alumnus fundatio*“
- Nagrada za postignuće u kulturi i umjetnosti „*Culturum artem fundatio*“
- Nagrada za dječiju humanu priču „*Infantem fundatio*“
- Nagrada za izuzetna postignuća u sportu „*Sportum fundatio*“
- Nagrada za postignuće u izgradnji mira i međuetničkog dijaloga „*Dialogum fundatio*“
- Nagrada za postignuće u izgradnji socijalne pravde i socijalne uključenosti „*Societas fundatio*“.

Član 5.

Nagrade u kategorijama navedenim u članu 4. ovog Pravilnika dodjeljuju se istaknutim pojedincima, koji su dokazani u promoviranju civilizacijskih vrijednosti u društvu i kategoriji za koju se nominiraju.

Svaka pojedinačna nagrada glasi na ime jedne osobe.

Dvije ili više osoba mogu da budu nominirane za nagradu u istoj kategoriji, ali nagrada u pojedinačnoj kategoriji može biti dodijeljena samo jednoj osobi.

Jedna osoba može biti nominirana za dodjelu nagrada u više kategorija, ali toj osobi se nagrada može dodijeliti samo u jednoj kategoriji u kojoj je ostvarila najviši rang vrednovanja.

Istaknuti pojedinci kandidati za dodjelu nagrada Fondacije mogu da budu domaći i strani državljani, bez obzira na bilo koji vid različitosti.

Član 6.

Za nagradu Fondacije ne mogu biti nominovane niti razmatrane osobe koje su pravosnažno presuđene od strane domaćih ili međunarodnih sudova u krivičnim djelima koja mogu da obuhvate i narušavanje integriteta Fondacije i/ili kategorije u koju se nominira takva predložena osoba, ili da se protiv njih vodi bilo koji oblik krivičnog postupka pred domaćim ili međunarodnim pravosuđem.

Prilikom razmatranja nominiranja i izbora kandidata za nagrade Fondacije, kandidati prethodno moraju pribaviti i odgovarajući dokaz od nadležnih organa kojim se utvrđuje postojanje preduslova iz prethodnog stava.

Član 7.

Postupak izbora i nominiranja osoba za nagradu iz svake pojedinačne kategorije provodi *Komisija za nominiranje, vrednovanje i postupak izbora kandidata za dodjelu nagrada Fondacije* (u daljem tekstu: Komisija).

Član 8.

Upravni odbor imenuje članove Komisija za svaku nagrađivanu kategoriju.

Imenovana Komisija sastoji se od najmanje tri člana, a najviše sedam članova.

Odluke Komisija se smatraju važećima ako se izglasaju konsenzusom na sjednici Komisije kojoj prisustvuje najmanje tri člana Komisije.

Članovi Komisije između sebe biraju predsjednika Komisije.

Članovi Komisije moraju biti istaknute osobe koje su dokazani stručnjaci iz date oblasti/kategorije, i koji mogu biti dostojni reprezentanti navedene kategorije/oblasti za koju se vrši postupak nominiranja i nagrađivanja kandidata.

Mandat članova Komisije traje 4 godine, sa mogućnošću jednog ponovnog izbora.

Član 9.

Rad Komisije se zasniva na utvrđenim *Kriterijima za nominiranje, vrednovanje i postupak izbora kandidata za dodjelu nagrada Fondacije* (u daljem tekstu: Kriteriji Komisije).

Kriterije Komisije utvrđuje Upravni odbor Fondacije posebnom odlukom, na prijedlog istanutih predstavnika i stručnjaka iz oblasti/kategorije za koju se vrši postupak nominiranja, vrednovanja i nagrađivanja kandidata.

Član 10.

Komisija utvrđuje *Prijedlog za nominiranje kandidata za dodjelu nagrade Fondacije u određenoj kategoriji* (u daljem tekstu: Prijedlog Komisije).

Odluke Komisije o konačnom prijedlogu za izbor kandidata za dodjelu nagrade Fondacije donose se konsenzusom – jednoglasnim usvajanjem date Odluke od strane svih prisutnih članova Komisije na sjednici Komisije.

Član 11.

Rad Komisija je javan i transparentan.

Komisije rade u sjednicama koje mogu biti organizovane i elektronskim putem.

Rad Komisije se provodi u fazama i vremenskim rokovima za svaku kalendarsku godinu na sljedeći način:

- Faza 1: *Inicijalni sastanak Komisije;*
 - o Vremenski rok: najkasnije *do 10. januara* kalendarske godine u kojoj se vrši dodjela nagrade,
- Faza 2: *Istraživanje raspoloživih relevantnih izvora i prikupljanje informacija o potencijalnim kandidatima za nominiranje nagrade;*
 - o Vremenski rok: najkasnije *do 30. marta* kalendarske godine u kojoj se vrši dodjela nagrade,
- Faza 3: *Priprema i pisanje Izvještaja Komisije o kandidatima za nominiranje nagrade;*
 - o Vremenski rok: najkasnije *do 15. aprila* kalendarske godine u kojoj se vrši dodjela nagrade,
- Faza 4: *Završni sastanak Komisije, razmatranje i usvajanje Izvještaja Komisije o kandidatima za nominiranje nagrade, upućivanje Prijedloga Komisije Upravnom odboru Fondacije;*
 - o Vremenski rok: najkasnije *do 30. aprila* kalendarske godine u kojoj se vrši dodjela nagrade.

Član 12.

Upravni odbor Fondacije, na osnovu Prijedloga Komisije iz faze 4. prethodnog člana, utvrđuje konačnu *Odluku o dodjeli nagrade Fondacije u određenoj kategoriji* (u daljem tekstu: Odluka o dodjeli nagrade).

Odluka o dodjeli nagrade donosi se najkasnije do 16. maja kalendarske godine u kojoj se vrši dodjela nagrade.

Član 13.

Nagrade Fondacije se dodjeljuju jedanput godišnje, na „Svečanoj akademiji“ Fondacije u povodu njene godišnjice osnivanja, na datum koji je utvrđen kao „Godišnjica Fondacije“.

Fondacija je osnovana dana 30. juna 2014. godine, ali se, u skladu sa vremenskim planom, događaj organizovanja „Svečane akademije“ Fondacije može utvrditi i na drugi prikladan datum u datoj kalendarskoj godini.

Mjesto organizovanja „Svečane akademije“ Fondacije je, u pravilu, predviđeno u Gradskom pozorištu u Prijedoru, osim ukoliko Upravni odbor Fondacije ne donese drugačiju odluku.

Član 14.

Nagrada Fondacije se sastoji iz sljedećih dijelova:

- i. Odluke o dodjeli nagrade Fondacije u datoj kategoriji (koju je donio Upravni odbor Fondacije),
- ii. Plakete (u skraćenoj verziji teksta ove Odluke, u štampanom obliku, u odgovarajućoj formi zahvalnice/diplome sa svečanim koricama)
- iii. Simbola Fondacije u fizičkom obliku – Statue Fondacije, koji simbolizira i kategoriju date nagrade.

Upravni odbor može odlučiti i o drugim vrstama i oblicima Nagrade Fondacije, koje uređuje posebnom odlukom.

Član 15.

Odluka o dodjeli nagrade Fondacije u datoj kategoriji iz člana 14, tačka pod i, sastoji se od najmanje sljedećih sadržaja: preambule, broja i datuma odluke, naziva odluke, imenovanog primaoca na koga se predmetna odluka odnosi, naziva kategorije, naziva nagrade, sastava i imena članova Komisije koji su dostavili prijedlog Upravnom odboru, potpis predsjednika Upravnog odbora Fondacije, potpis predsjednika Fondacije i otisak pečata Fondacije.

Plaketa iz člana 14, pod tačkom ii, ispisana je sljedećim tekstom, sa grafičkim prikazom i rasporedom odozgo prema dole:

Fondacija „Idriz Jakupović“

Logo Fondacije (ili drugu odgovarajuću grafiku)

Dodjeljuje

Ime i prezime (ukoliko je odlučeno, navesti i afilijaciju osobe na koju glasi nagrada; navesti u dativu ime i prezime)

Nagradu za (navesti puni naziv nagrade, sa dodatkom latinskog naziva)

Predsjednik Upravnog odbora Fondacije „Idriz Jakupović“

Prof.dr.sci.Sanel Jakupović (s desne strane)

Direktor Fondacije „Idriz Jakupović“

Dr.med.dent.Ajdin Jakupović(s lijeve strane)

U Prijedoru, dana 30.juna (navesti kalendarsku godinu u kojoj se dodjeljuje predmetna nagrada)

Izgled simbola Fondacije u fizičkom obliku-Statue Fondacije, kao sastavnog dijela nagrade Fondacije iz člana 14, pod tačkom iii, uređuje se posebnom odlukom Upravnog odbora Fondacije, na osnovu prihvaćenog tehničkog rješenja stručne osobe.

Član 16.

Nagrade Fondacije, u pravilu, uručuju primaocima nagrada Predsjednik Fondacije i Predsjednik Upravnog odbora Fondacije, naizmjenično prema protokolu koji je definisan u programu „Svečane akademije“.

Nagrade Fondacije mogu biti uručene i od strane drugih osoba koje odredi Upravni odbor Fondacije.

Član 17.

Ovaj Pravilnik je izrađen u 5 štampanih primjeraka i oglašen na oglasnoj ploči Fondacije.

Pravilnik stupa na snagu 15.februara 2018.godine.

Interni broj Pravilnika: PNF-01-1/2018

Broj odluke Upravnog odbora: 02-02/2018

Datum Odluke: 06.02.2018.godine.

Predsjednik Upravnog odbora Fondacije:
Prof.dr.sci.Sanel Jakupović